

八

編

類

纂

八編類纂卷之一百五十三

左編

臣類 相臣

漢周勃 中興

周勃沛人其先卷人也徙沛勃以織薄曲爲生常以吹簫給喪事材官引強高祖之爲沛公初起勃以中涓從勃既定燕而歸高帝已崩矣以列侯事惠帝惠帝六年置太尉官以勃爲太尉十年高后崩呂祿以趙王爲漢上將軍呂產以呂王爲相國秉權欲危劉氏勃與丞相平朱虛侯章共誅諸呂于是陰謀以爲

少帝及濟川淮陽恒山王皆非惠帝子呂太后以計詐名他人子殺其母養之後宮令孝惠子之立以爲後用彊呂氏令已滅諸呂少帝卽長用事吾屬無類矣不如視諸侯賢者立之遂迎立代王是爲孝文皇帝東牟侯興居朱虛侯章弟也曰誅諸呂臣無功請得除宮乃與太僕汝陰滕公入宮滕公前謂少帝曰足下非劉氏不當立乃顧麾左右執戟皆什兵罷有數人不肯去宦者令張釋諭告亦去滕公召乘輿車載少帝出少帝曰欲持我安之乎滕公曰就舍少府乃奉天子法駕迎皇帝代邸報曰宮謹除皇帝入未

謝歸相印
後可勿出
矣

央宮有謁者十人持戟衛端門曰天子在也足下何
爲者不得入太尉往喻乃引兵去皇帝遂入是夜有
司分部誅濟川淮陽常山王及少帝于邸文帝卽位
以勃爲右丞相賜金五千斤邑萬戶居十餘月人或
說勃曰君旣誅諸呂立代王威震天下而君受厚賞
處尊位以厭之則禍及身矣勃懼亦自危乃謝請歸
相卽上許之歲餘陳丞相平卒上復用勃爲丞相十
餘月上曰前日吾詔列侯就國或頗未能行丞相朕
所重其爲朕率列侯之國乃免相就國歲餘每河東
守尉行縣至絳絳侯勃自畏恐誅常被甲令家人衛
持

兵以見其後人有上書告勃欲反下廷尉逮捕勃治之勃恐不知置辭吏稍侵辱之勃以千金與獄吏獄吏乃書牘背示之曰以公主爲證公主者孝文帝女也勃太子勝之尚之故獄吏教引爲證初勃之益封盡以子薄昭及繫急薄昭爲言薄太后太后亦以爲無反事文帝朝太后以冒絮提文帝曰絳侯綰皇帝璽將兵于北軍不以此時反今居一小縣顧欲反邪文帝旣見勃獄辭乃謝曰吏方驗而出之於是使使持節赦勃復爵邑勃旣出曰吾嘗將百萬軍安知獄吏之貴也勃後就國孝文十一年薨謚曰武侯子勝

之嗣尚公主不相中坐殺人國除絕一年弟亞夫復
爲侯亞夫死國絕一歲更封勃他子堅爲平曲侯續
絳侯後傳子建德爲太子太傅坐酎金免官後有罪
國除至平帝元始二年繼世復封玄孫之子恭爲絳
侯千戶

漢霍光

霍光字子孟票騎將軍去病弟也父中孺河東平陽
人以縣吏給事平陽侯家與侍者衛少兒私通而生
去病中孺吏畢歸家娶婦生光因絕不相聞久之少
兒女弟子夫得幸于武帝立爲皇后去病以皇后姊

子貴幸旣壯大乃自知父爲霍中孺未及求問會爲
票騎將軍擊匈奴道出河東太守郊迎負弩矢先驅
至平陽傳舍遣吏迎霍中孺趣入拜謁將軍迎拜因
跪曰去病不早自知爲大人遺體也中孺扶服叩頭
曰老臣得託命將軍此天力也去病大爲中孺買田
宅奴婢而去還復過焉乃將光西至長安時年十餘
歲任光爲郎稍遷諸曹侍中去病死後光爲奉車都
尉光祿大夫出則奉車入侍左右出入禁闥二十餘
年小心謹慎未嘗有過甚見親信征和二年衛太子
爲江充所敗而燕王旦廣陵王胥皆多過失是時上

年老寵姬鈎弋趙婕妤有男上心欲以爲嗣命大臣
輔之察羣臣唯光任大重可屬社稷上乃使黃門畫
者畫周公負成王朝諸侯以賜光後元二年春上游
五柞宮病篤光涕泣問曰如有不諱誰當嗣者上曰
君未諭前畫意耶立少子君行周公之事光頓首讓
曰臣不如金日磾日磾亦曰臣外國人不如光上以
光爲大司馬大將軍日磾爲車騎將軍及太僕上官
桀爲左將軍搜粟都尉桑弘羊爲御史大夫皆拜臥
內床下受遺詔輔少主明日武帝崩太子襲尊號是
爲孝昭皇帝帝年八歲政事一決于光先是後元年

侍中僕射莽何羅與弟重合侯通謀爲逆時光與金日磾上官桀等共誅之功未錄武帝病封璽書曰帝崩發書以從事遺詔封金日磾爲柁侯上官桀爲安陽侯光爲博陸侯皆以前捕反者功封時衛尉王莽子男忽侍中揚語曰帝病忽常在左右安得遺詔封三子事羣兒自相貴耳光聞之切讓王莽莽酖殺忽光爲人沉靜詳審長財七尺三寸白晢疏眉目美須髯每出入下殿門止進有常處郎僕射竊視之不失尺寸其資性端正如此初輔幼主政自己出天下想聞其風采殿中常有恠一夜羣臣相驚光召尚符

璽郎郎不肯授光。光欲奪之。郎按劍曰。臣頭可得。璽
不可得也。光甚誼之。明日詔增此郎秩二等。衆庶莫
不多光。光與左將軍桀結婚相親。光長女爲桀子安
妻。有女年與帝相配。桀因帝姊鄂邑蓋主內安女後
宮爲倖。忤數月立爲皇后。父安爲票騎將軍。封桑樂
侯。光時休沐出。桀輒入代光決事。桀父子旣尊盛而
德長公主。公主內行不修。近幸河間丁外人。桀家欲
爲外人求封。幸依國安故事。以列侯尚公主者。光不
許。又爲外人求光祿大夫。欲令得召見。又不許。長主
大以是怨光。而桀安數爲外人求官爵。弗能得。亦慙。

自先帝時，桀已爲九卿，位在光右。及父子並爲將軍，有椒房中宮之重，皇后親安女，光乃其外祖，而顓專制朝事。繇是與光爭權。燕王旦自以昭帝兄，常懷怨望。及御史大夫桑弘羊建造酒榷鹽鐵，爲國興利，伐其功，欲爲子弟得官，亦怨恨光。於是蓋主上官桀、安及弘羊皆與燕王旦通謀，詐令人爲燕王上書言：「光出都肄郎羽林道上，稱趣太官，先置。」又引蘇武前使匈奴，拘留二十年，不降還，乃爲典屬國。而大將軍長史敞亡功，爲搜粟都尉。又擅調益莫府校尉。光專權，自恣疑有非常，臣旦願歸符璽，入宿衛，察奸臣變，候

伺光出沐日奏之。桀欲從中下其事。桑弘羊當與諸大臣共執退光書。奏帝不肯下。明旦光聞之。止畫室中。不入。上問大將軍安在。左將軍桀對曰。以燕王告其罪。故不敢入。有詔召大將軍。光入。免冠頓首謝。上曰。將軍冠。朕知是書詐也。將軍亡罪。光曰。陛下何以知之上。曰。將軍之廣明都郎屬耳。調校尉以來。未能十日。燕王何以得知之。且將軍爲非。不須校尉。是時帝年十四。尚書左右皆驚。而上書者果亡捕之甚急。桀等懼。自上小事不足遂上不聽。後桀黨與有譖光者。上輒怒曰。大將軍忠臣。先帝所屬。以輔朕身。敢有

毀者坐之自是桀等不敢復言。乃謀令長公主置酒請光，伏兵格殺之。因廢帝，迎立燕王爲天子。事發覺，光盡誅桀、安、外人宗族。燕王蓋主背自殺。光威震海內。昭帝旣冠，遂委任光。訖十三年，百姓克實，四夷賓服。燕蓋之亂，桑弘羊子遷亡。過父故吏吳，後遷捕得伏法。會赦，吳自出繫獄。廷尉王平與少府徐仁雜治，皆以爲吳非匿反者，乃匿爲隨者，卽以赦令除吳罪。後侍御史治實，以桑遷通經術，知父謀反而不諫爭，與反者身無異。吳故三百石吏首匿，遷不與庶人匿隨從者等，吳不得赦。奏請覆治。劾廷尉少府縱。

反者。仁丞相千秋女壻也。千秋召中二千石博士會
公車門。議問吳法。議者知大將軍指。皆執吳爲不道。
明日千秋封上衆議。光於是以千秋擅召中二千石
以下。外內異言。遂下平任獄。朝廷皆恐丞相坐之。杜
延年奏記光曰。吏縱罪人有常法。今更詆吳爲不道。
恐於法深。又丞相素無所守持。而爲好言于下。蓋其
素行也。至擅召中二千石。甚無狀。延年以爲丞相久
故。及先帝用事。非有大故。不可弃也。間者民頗言獄
深。吏爲峻詆。今丞相所議。又獄事也。如是。以及丞相
恐不合衆心。羣下謹譁。庶人私議。流言四布。延年竊

重將軍失此名於天下也。光以平仁弄法，卒下之獄。仁自殺。平要斬而不以爲丞相，終與相竟。延年持論平合和朝廷，皆此類也。元平元年，昭帝崩，亡嗣。武帝六男，獨有廣陵王胥在。羣臣議所立，咸持廣陵王。王本以行失道，先帝所不用。光內不自安，即有上書言周大王廢太伯，立王季。文王舍伯邑考，立武王。唯在所宜，雖廢長立少，可也。廣陵王不可以承宗廟。言合光意。光以其書視丞相敞等，擢郎爲九江太守。即日承皇太后詔，遣行大鴻臚事少府樂成宗正德光祿大夫吉中郎將利漢迎昌邑王賀。賀者武帝孫昌邑

哀王子也。既至，卽位。行淫亂，光憂懣，獨以問所親故吏大司農田延年。延年曰：將軍爲國柱石，審此人不可，何不建白太后，更選賢而立之？光曰：今欲如是，於古嘗有此不？延年曰：伊尹相殷，廢太甲，以安宗廟，後世稱其忠。將軍若能行此，亦漢之伊尹也。光乃引延年給事中，陰與車騎將軍張安世圖計，遂召丞相御史將軍列侯中二千石大夫博士會議未央宮。光曰：昌邑王行昏亂，恐危社稷，如何？羣臣皆驚愕失色，莫敢發言，但唯唯而已。田延年前離席按劍曰：先帝屬將軍以幼孤，寄將軍以天下，以將軍忠賢，能安劉氏

太后著上
官氏也

也。今羣下鼎沸，社稷將傾。且漢之傳謚，常爲孝者。以長有天下，令宗廟血食也。如令漢家絕祀，將軍雖死，何面目見先帝於地下乎？今日之議，不能旋踵，羣臣後應者，臣請劒斬之。光謝曰：「九卿責光是也，天下何不安？光當受難。」於是議者皆叩頭曰：「萬姓之命在於將軍。」唯大將軍令光卽與羣臣俱見白太后。具陳昌邑王不可以承宗廟狀。皇太后乃車駕幸未央承明殿，詔諸禁門毋內昌邑羣臣。王入朝，太后還乘輦，欲歸温室中。黃門宦者各持門扇，王入門，閉。昌邑羣臣不得入。王曰：「何爲？」大將軍跪曰：「有皇太后詔，毋由。」

昌邑羣臣。王曰徐之。何乃驚人如是。光使盡驅出昌邑羣臣。置金馬門外。車騎將軍安世將羽林騎收縛二百餘人。皆送廷尉詔獄。令故昭帝侍中中臣守王光。敕左右謹宿衛。率有物故自裁。令我負天下。有殺主名。王尚未自知。當廢謂左右我故羣臣從官。安得罪。而大將軍盡繫之乎。頃之。有太后詔召王。王聞召意恐。乃曰我安得罪而召我哉。太后被珠襦盛服。坐武帳中。侍御數百人。皆持兵。期門武士陛戟陳列。殿下羣臣以次上殿。召昌邑王伏前聽詔。光與羣臣連名奏。上尚書令讀奏。光坐庭中。會丞相以下議定所

立廣陵王已前不用及燕刺王反誅其子不在議中
近親唯有衛太子孫號皇曾孫在民間咸稱述焉光
遂復與丞相敞等上奏曰禮曰人道親親故尊祖尊
祖故敬宗太宗亡嗣擇支子孫賢者爲嗣孝武皇帝
曾孫病已武帝時有詔掖庭養視至今年十八師受
詩論語孝經躬行節儉慈仁愛人可以嗣孝昭皇帝
後奉承祖宗廟于萬姓臣昧死以聞皇太后詔曰可
光遣宗正劉德至曾孫家尚冠里洗沐賜御衣太僕
以軫獵車迎曾孫就齋宗正府入未央宮見皇太后
封爲陽武侯已而光奉上皇帝璽綬謁于高廟是爲

孝宣皇帝天子思光功德下詔曰故司馬大將軍博
陸侯宿衛孝武皇帝二十有餘年遭大難躬秉誼率
三公九卿大夫定萬世策以安社稷天下蒸庶咸以
康寧功德茂盛朕甚嘉之復其後世疇其爵邑世世
無有所與功如蕭相國明年夏封太子外祖父許廣
漢爲平恩侯復下詔曰宣成侯光宿衛忠正勤勞國
家善善及後世其封光兄孫中郎將雲爲冠陽侯禹
旣嗣爲博陸侯太夫人顯改光時所自造塋制而後
大之起三出闕築神道北臨昭靈南出承恩盛飾祠
室輦閣通屬承巷而幽良人婢妾守之廣治第室作

乘輿輦加畫綉網馮黃金塗韋絜薦輪侍婢以五采
絲輓顯游戲第中初光愛幸監奴馮子都常與計事
及顯寡居與子都亂而禹山亦並繕治第宅走馬馳
逐平樂館雲當朝請數稱病私出多從賓客張圍獵
黃山苑中使蒼頭奴上朝謁莫敢譴者而顯及諸女
晝夜出入長信宮殿中亡期度宣帝自在民間聞知
霍氏尊盛日久內不能善光薨上始躬親朝政御史
大夫魏相給事中顯謂禹雲山女曹不務奉太將軍
餘業今大夫給事中他人一間女能後自救邪後兩
家奴爭道霍氏奴入御史府欲踰大夫門御史爲叩

頭謝乃去。人以謂霍氏顯等始知憂會。魏大夫爲丞相數燕見。言事平。恩侯與侍中金安上等徑出入省中。時霍山自若領尚書。上令吏民得奏封事不關尚書。羣臣進見獨往來。於是霍氏甚惡之。宣帝始立。立微時許妃爲皇后。顯愛小三成君。欲貴之。私使乳醫淳于衍行毒藥殺許后。因勸光內成君。代立爲后。始許后暴崩。吏捕諸醫劾衍侍疾亡狀不道。下獄。吏簿問急。顯恐事敗。卽具以實語。光光大驚。欲自發舉。不忍。猶與會奏。上因署衍勿論。光薨後。語稍泄。於是上始聞之而未察。乃徙光女督度遼將軍表。央衛尉平。

陵侯范明友爲光祿勳次壻諸吏中郎將羽林監任勝出爲安定太守數月復出光姊壻給事中光祿大夫張朔爲蜀郡太守羣孫壻中郎將王漢爲武威太守頃之復徙光長女壻長樂衛尉鄧廣漢爲少府更以禹爲大司馬冠小冠亡印綬罷右將軍屯兵官屬特使禹官名爲光俱大司馬者又收范明友度遼將軍印綬但爲光祿勳及光仲女壻趙平爲散騎都尉光祿大夫將屯兵又收平騎都尉印綬諸領胡越騎羽林及兩官衛將屯兵悉易以所親信許史子弟代之禹爲大司馬稱病禹故長史任宣侯問禹曰我何

病縣官非我家將軍。不得至是。今將軍墳墓未乾。盡外我家反任許史奪我印綬。令人不省死。宣見禹恨望深。乃謂曰。大將軍時何可復行。持國權柄。殺生。在手中。廷尉李种。王平。左馮翊賈勝。胡及車丞相女壻少府徐仁。皆坐逆將軍意。下獄死。史樂成。小家子。得幸將軍。至九卿封侯。百官以下。但事馮子都。王子方等。視丞相亡如也。各自有時。今許史自天子骨肉。貴正宜耳。大司馬欲用是怨恨。愚以爲不可。禹默然。數日起視事。顯及禹山雲自見日。侵削數相對啼泣。自怨。山曰。今丞相用事。縣官信之。盡變易太將軍時法。

令以公田賦與貧民、發揚大將軍過失、又諸儒生多
窶人子、遠客饑寒、喜妄說狂言、不避忌諱、大將軍常
讐之、今陛下好與諸儒生語、人人自使書封事、多言
我家者、常有上書言大將軍時主弱臣強、專制擅權、
今其子孫用事、昆弟益驕恣、恐危宗廟、災異數見、盡
爲是也、其言絕痛、山屏不奏其書、後上書者益黠、盡
奏封事、輒使中書令出取之、不關尚書、益不信人顯
曰、丞相數言我家、獨無罪乎、山曰、丞相廉正、安得罪、
我家昆弟諸壻多不謹、又聞民間謠言霍氏毒殺許
皇后、寧有是邪、顯恐急、卽具以實告山、山雲、禹

驚曰、如是何不早告、禹等縣官離散、斥逐諸壻、用是故也、此大事、誅罰不小、奈何、於是始有邪謀矣、初趙平客石夏善爲天官語、平曰、熒惑守御星、御星太僕奉車都尉也、不黜則死、平內憂、山等雲、舅李竟所善、張赦見雲家卒、卒謂竟曰、今丞相與平恩侯用事、可令太夫人言、太后先誅此兩人、私徙陛下在太后耳、長安男子張章告之事、下廷尉、執金吾捕張赦、石夏等、後有詔止勿捕、山等愈恐、相謂曰、此縣官重太后、故不竟也、然惡端已見、又有殺許后事、陛下雖寬仁、恐左右不聽、久之猶發發卽族矣、不如先也、遂令諸

女各歸報其夫、皆曰安所相避、會李竟坐與諸侯王交通辭語及霍氏、有詔雲山不宜宿衛、免就第、光諸女遇太后無禮、馮子都數犯法、上并以爲讓、山禹等甚恐、山曰、丞相擅滅宗廟、烹菟鼯、可以此罪也、謀令太后爲博平君、置酒、召丞相平恩侯以下、使范明友、鄧廣漢承太后制、引斬之、因廢天子而立禹、約定未發、雲拜爲玄菟太守、太中大夫、任宣爲代郡太守、山又坐寫秘書、顯爲上書、戲城西第、入馬千匹、以贖山罪、書報聞、會事發、覺雲、山明世自殺、顯、禹、廣漢等捕得禹、要斬、顯及諸女昆弟皆棄市、唯獨霍后廢處、昭

臺宮與霍氏相連坐誅滅者數千家。上乃下詔曰：「乃者東織室令史張赦使魏郡豪李竟報寇陽侯雲謀爲大逆。朕以大將軍故抑而不揚，冀其自新。今大司馬博陸侯禹與母宣成侯夫人顯及從昆弟子寇陽侯雲、樂平侯山、諸姊妹壻謀爲大逆，欲誅誤百姓，賴宗廟神靈先發得咸伏其辜。朕甚悼之，諸爲霍氏所誑誤，事在丙申前未發覺在吏者，皆赦除之。男子張章先發覺，以語期門董忠，忠告左曹楊惲，惲告侍中金安上，惲召見對狀。後章上書以聞，侍中史高與金安上建發其事，言無入霍氏禁闥，卒不得遂其謀，皆

讐有功封章爲博成侯忠高昌侯惲平通侯安上都
成侯高樂陵侯初霍氏奢侈茂陵徐生曰霍氏必亡
夫奢則不遜不遜必侮上侮上者逆道也在人之左
衆必害之霍氏秉權日久害之者多矣天下害之而
又行以逆道不亡何待乃上疏言霍氏泰盛陛下卽
愛厚以時抑制無使至亡書三上輒報聞其後霍氏
誅滅而告霍氏者皆封人爲徐生上書上乃賜福帛
十匹後以爲郎宣帝始立謁見高廟大將軍光從驂
乘上內嚴憚之若有芒刺在背後車騎將軍張安世
代光驂乘天子從容肆體甚安近焉及光身死而宗

一漢家恩私
不薄光子
得自以奢
抵恃逆亡
而與縣丞

族竟誅故俗傳之曰威震主者不畜霍氏之禍萌於
驂乘至成帝時爲光置守冢百家吏卒奉祠焉元始
二年封光從父昆弟曾孫陽爲博陸侯千戶初諫大
夫杜延年見國家承武帝奢侈師族之後數爲大將
軍光言年歲比不登流民未盡還宜修孝文時政示
以儉約寬和順天心說民意年歲宜應光納其言光
以朝無舊臣光祿勳張安世自先帝時爲尚書令志
行純篤乃白用安世爲右將軍兼光祿勳以自副焉
光又以杜延年有忠節擢爲太僕右曹給事中光持
刑罰嚴延年常輔之以寬吏民上書言便宜有異輒

下延年平處復奏言可官試者至爲縣令或丞相御史除用滿歲以狀聞或抵其罪法常與兩府及廷尉分章

晉王導

王導字茂弘瑯琊臨沂人覽之孫也導少有風鑒識量清遠年十四陳留高士張公見而奇之謂其從兄敦曰此兒容貌志氣將相之器也參東海王越軍事時元帝爲瑯琊王與導素相親善導知天下已亂遂傾心推奉潛有興復之志帝亦雅相器重契同友執帝之在洛陽也導每勸令之國會帝出鎮下邳請導

爲安東司馬軍謀密策知無不爲及徙鎮建康吳人不附居月餘士庶莫有至者導患之會敦來朝導謂之曰瑯琊王仁德雖厚而名論猶輕兄威風已振宜有以匡濟者會三月上巳帝親觀禊乘肩輿具威儀敦導及諸名勝皆騎從吳人紀瞻顧榮旨江南之望竊覘之見其如此咸驚懼乃相率拜于道左導因進計曰古之王者莫不賓禮故老存問風俗虛已傾心以招俊乂况天下喪亂九州分裂大業草創急于得人者乎顧榮賀循此土之望未若引之以結人心二人旣至則無不來矣帝乃使導射造循榮二人皆應

命而至、由是吳會風靡、百姓歸心焉、自此之後、漸相
崇奉、君臣之禮始定、俄而洛京傾覆、中州士女避亂
江左者十六七、導勸帝收其賢人君子、與之圖事、帝
從之、辟掾屬百餘人、時人謂之百六掾、以前潁川太
守刁協爲軍諮祭酒、前廣陵相卞壺爲從事中郎、江
寧令諸葛恢、歷陽參軍陳國陳頽爲行參軍、前太僕
掾庾亮爲西曹掾、時荆揚晏安、戶口殷實、導爲政務
在清靜、每勸帝克己勵節、匡主寧邦、于是尤見委杖、
情好日隆、朝野傾心、號爲仲父、帝嘗從容謂導曰、卿
吾之蕭何也、對曰、昔秦爲無道、百姓厭亂、巨猾陵暴、

人懷漢德、革命反正、易以爲功、自魏以來、迄于太康、
之際、公卿世族、豪侈相高、政教陵遲、不遵法度、郡公
卿士、皆廢于安息、遂使奸人乘釁、以虧至道、然否終
斯泰、天道之常、大王方立命世之勲、一匡九合、管仲
樂毅、于是乎在、豈區區國臣所可擬議、願弘深神慮、
廣擇良能、顧榮賀循、鮑瞻周玘、皆南土之秀、願盡優
禮、則天下安矣、帝納焉、永嘉末、遷丹陽太守、加輔國
將軍、導上牋曰、晉魏武帝、達政之主也、荀文若、功臣
之最也、封不過亭侯、倉舒愛子之寵、贈不過別部司
馬、以此格萬物、得不局跡乎、今者臨郡、不問賢愚、豪

致知
所
知也

賤皆加重號輒有鼓蓋動見相準時有不得者或爲
恥之天官混雜朝望頽毀導忝荷重任不能崇浚山
海而開導亂源饗竊名位取素羹典謹送鼓蓋加崇
之物請從導始庶令雅俗區別羣望無惑帝從之拜
振威將軍晉國既建以導爲丞相軍諮祭酒桓彝初
適江見朝廷微弱謂周顗曰我以中州多故來此欲
求全活而寡弱如此將何以濟憂懼不樂往見導極
談世事還謂顗曰向見晉夷吾無復憂矣過江人士
每至暇日相要出新亭飲宴周顗中坐而歎曰風景
不殊舉目有江山之異皆相視流涕惟導愀然變色

曰當共戮力王室克復神州何至作楚囚相對泣邪
衆收淚而謝之帝卽晉王位尊拜揚州刺史陳頤遣
王導書曰中華所以傾弊者正以取才失所先白望
而後實事浮競驅馳互相貢薦言重者光顯言輕者
後敘遂相波扇乃至陵遲加有莊老之俗傾惑朝廷
養望者爲弘雅政事者爲俗人王職不恤法物墜喪
夫欲制遠先由近始今宜改張明賞信罰拔卓茂于
密縣顯朱邑于桐鄉然後大業可舉中興可冀耳導
不能從及帝登尊號百官陪立命導升御牀共坐導
固辭至二十四日若太陽下同萬物蒼生何由仰照

帝乃止。進位侍中、司空，假節錄尚書，領中書監。以刁協爲尚書令，協性剛悍，與物多忤。與侍中劉隗俱爲帝所寵任，欲矯時弊，每崇上抑下，排沮豪強，故爲王氏所疾。諸刻碎之政，皆云隗協所建。協又使酒，侵毀公卿。見者側目。帝之始鎮江東也，王敦與從弟導同心翼戴，帝亦推心任之。敦總征討，導專機政。羣從子弟布列顯要。時人爲之語曰：王與馬，共天下。後敦恃功驕恣，帝畏而惡之，乃引劉隗、刁協等以爲腹心，稍抑損王氏權。導亦漸見疎外。中書郎孔愉、陳導忠賢，有佐命之勲，宜加委任。帝出愉爲長史，導能任真，推

受其救授
九不可

分澹如也而敦益懷不平其參軍沈充錢鳳皆巧譖
凶狡知敦有異志陰爲畫策執寵信之敦上疏爲導
訟屈辭詔怨望帝以敦故并疎忌導御史中丞周嵩
上疏以爲導素竭忠誠輔成大業不宜聽孤臣之言
惑疑似之說放逐舊德以佞伍賢虧旣往之恩招將
來之患帝頗感悟導由是得全會太山太守徐寵反
帝訪可以鎮撫河南者導舉太子左衛率羊監旣而
監敗抵罪導上疏乞自貶黜詔不許尋代賀循領太
子太傅時中興草創未置史官導始啟立于是典籍
頗具時孝懷太子爲胡所害始奉諱有司奏天子三

朝舉哀羣臣一哭而已導以爲太子副二宸極普天有情宜同三朝之哀從之王敦之反也劉隗勸帝悉誅王氏論者爲之危心導率羣從昆弟子姪二十餘人每旦詣臺待罪僕射周顗將入導字呼之曰伯仁以百口累卿覲直入不顧既見帝言導忠誠申救甚至帝納其言顗喜飲酒至醉而出導又呼之顗不與言顧左右曰今年殺諸賊奴取金印如斗大繫肘後既出又上表明導無罪言甚切導不知恨之帝以導忠節有素特還朝服召見之導稽首謝曰逆臣賊子何代無之豈意今者近出臣族帝跣而執之曰茂弘

方託百里之命于卿，是何言邪？乃詔曰：導以大義，滅親，可以吾爲安東時節，假之。及敦得志，導守尚書令，敦據石頭。叅軍呂猷說敦曰：驃騎將軍戴淵，僕射周顗，皆有高名，足以惑衆，公不除之，恐必有再舉之憂。敦然之以問導，曰：周戴南北之望，當登三司，無疑也。導不荅，又曰：正應令僕邪？又不荅。敦曰：若不爾止，當誅耳。又不荅。敦遂遣部將收殺之。導後料檢中書故事，乃見顗表，執之流涕，曰：吾雖不殺伯仁，伯仁由我而死，幽冥之中，負此良友。初，西都覆沒，海內思主，羣臣及四方並勸進于帝。時王氏強盛，有專天下之心。

敦憚帝賢明、欲更議所立、導固爭乃止。及此役也、敦謂導曰、不從吾言、幾致覆族。導猶執正議、敦無以能奪。初、帝愛瑯琊王衷、將有奪嫡之議、以問導。導曰、夫立子以長、且紹又賢、不宜改革。帝猶疑之。導日夕陳諫、故太子卒定。及明帝卽位、導受遺詔輔政、解揚州、遷司徒。一依陳羣輔魏故事。王敦又舉兵內向、時敦始寢疾、導便率子弟發哀、衆聞謂敦死、咸有奮志。及帝伐敦、假導節都督諸軍、領揚州刺史。敦平進位太保。帝崩、導復與庾亮等同受遺詔、共輔幼主。是爲成帝。及石勒侵阜陵、詔加導大司馬、假黃鉞出討之。軍

次江寧帝親餞于郊俄而賊退解大司馬咸和二年
庾亮以蘇峻在歷陽終爲禍亂欲下詔徵之導曰峻
必不奉詔不若且包容之亮曰今縱不奉命爲禍猶
淺若復經年不可復制猶七國之于漢也乃徵峻爲
大司農峻遂舉兵反三年正月蘇峻濟自橫江二月
峻兵入臺城司徒導謂侍中褚裒曰至尊當御正殿
君可啟令速出裒入上閣躬自抱帝登太極前殿
導及光祿大夫陸曄荀崧尚書張閭共登御牀擁衛
峻稱詔大赦以導有德望猶使以本官居巳之右峻
自爲驃騎將軍錄尚書事峻逼遷帝于石頭導固爭

不從。帝哀泣升車，官中慟哭。初，蘇峻遣尚書張閭、權督東軍司徒導、密令以太后詔諭三吳吏士，使起義兵救天子。會稽內史王舒以庾冰爲奮武將軍，使將東兵一萬西渡浙江。于是吳興太守虞潭、吳國內史蔡謨等皆舉兵應之。陶侃使毛寶攻祖約，約敗。蘇峻腹心路永、匡術、賈寧恐事不濟，勸峻盡誅司徒導等諸大臣，更樹腹心。峻雅敬導，不許。永等更二于峻，導使參軍袁耽潛誘永使歸順，導携二子與永皆奔白石。八月，侃兵斬峻，峻衆立峻弟逸爲主。四年，諸軍擊斬蘇逸，司徒導入石頭，令取故節。陶侃笑曰：「蘇武節。」

似不如是。導有慚色。路永匡術賈寧皆峻黨。先歸朝。延導欲賞之。嶠曰。永等首爲亂。階晚雖改。悟未足贖罪。得全首領。爲幸多矣。乃止。侃之討峻也。獨湘州刺史卞敦擁兵不赴。又不給軍糧。侃奏請檻車收付。廷尉導以喪亂之後。宜加寬宥。乃以敦爲廣州刺史。四年五月。以導爲太傅都督中外諸軍事。六月。以導爲丞相。罷司徒官。以并丞相府。導性寬厚。委任諸將。趙胤賈寧等多不奉法。大臣患之。庾亮與太尉郗鑒牋曰。主上自八九歲。以及成人。入則在官人之手。出則唯武官小人讀書。無從受章句。顧問未嘗遇君子。秦

政欲愚其黔首、天下猶知不可、况欲愚其主哉、人主
春秋旣盛、宜復子明辟、不稱首歸政、甫居師傅之尊、
多養無賴之士、公與下官、並荷付托之重、大奸不掃、
何以見先帝于地下乎、欲共起兵廢導、鑒不聽、及賊
平、宗廟宮室、並爲灰燼、溫嶠議遷都豫章、三吳之豪
請都會稽、二論紛紜、未有所適、導曰、建康古之金陵、
舊爲帝里、又孫仲謀、劉玄德俱言王者之宅、古之帝
王、不必以豐儉移都、苟弘衛文大帛之冠、則無往不
可、若不績其麻、則樂土爲虛矣、且北寇游魂、伺我之
隙、一旦示弱、窺于蠻越、求之望實、殊非良計、今特宜

鎮之以靜羣情自安由是嶠等謀並不行導善于因
事雖無日用之益而歲計有餘時帑藏空竭庫中惟
有練數千端鬻之不售而國用不給導患之乃與朝
賢俱制練布單衣于是士人翕然競服之練遂踊貴
乃令主者出賣端至一金其爲時所慕如此溫嶠卒
導欲以平南軍司劉胤爲江州刺史陶侃郗鑒皆以
胤非方伯才導不從或謂導子悅曰今大難紀綱頓
弛自江陵至建康三千餘里流民萬計布在江州江
州國之南藩要害之地而胤以汰侈之性臥而對之
不有外變必有內患矣悅曰此溫平南之意也溫嶠時爲

平南胤矜豪自甚。專務商販。積財百萬。縱酒酣樂。不恤政事。會有詔徵後將軍郭默爲右將軍。默樂爲邊將。不願宿衛。以情懇于胤。胤曰。此非小人之所及也。默將赴召。求資于胤。胤不與。默由是怨胤。會有司奏。今朝廷空竭。百官無祿。惟資江州運漕。而胤商販繼路。以私廢公。請免胤官。書下。胤不卽歸罪。方自中理。有謂郭默曰。劉江州不受免。密有異圖。忌孰候一人。欲先除之。默帥其徒襲胤。傳首京師。劉胤首至建康。導以郭默驍勇難制。梟胤首於大航。以默爲江州刺史。陶侃聞之。投袂起曰。此必詐也。卽將兵討之。上表。

言狀且與導書曰默殺方州卽川爲方州害宰相便
爲宰相乎導乃收胤首咎侃書曰默據上流之勢加
有船艦成資故包含容忍以候足下豈非遵養時晦
以定大事者邪侃笑曰是乃遵養時賊也兵至默將
縛默以降侃斬之六年冬蒸詔歸胙于導曰無下拜
導辭疾不敢當初帝幼冲見導每拜又嘗與導書手
詔則云惶恐言中書作詔則曰敬問于是以爲定制
自後元正導入帝猶爲之興焉時大旱導上疏遜位
詔累逼之然後視事導簡素寡慾食無儲穀衣不重
帛帝知之給布萬匹以供私費導有羸病不堪朝會

帝幸其府、縱酒作樂、後令輿車入朝、其見敬如此。石季龍掠騎至歷陽、導請出討之、是歲妻曹氏卒、贈金章紫綬。初、曹氏性妬、導甚憚之、乃密營別館、以處衆妾。曹氏知、將往焉、導恐妾被辱、遽令命駕、猶恐遲之、以所執麈尾柄驅牛而進。司徒蔡謨聞之、戲導曰、朝廷欲加公九錫、導弗之覺、但謙退而已。謨曰、不聞餘物、惟有短轅轅車、長柄麈尾、導大怒、謂人曰、吾往與羣賢共游洛中、何曾聞有蔡克兒也。于時庾亮以望重、地逼出鎮于外、南蠻校尉陶稱間說亮當舉兵內向、或勸導密爲之防。導曰、吾與元規休戚是同、悠悠

之談宜絕智者之口。卽如君言，元規若來，吾便角巾還第，復何懼哉？又與稱書以爲庾公。帝之元舅，宜善事之。于是讒間遂息。時亮雖居外鎮，而執輔弼之權。旣據上流，擁疆兵，趣向者多歸之。導內不平，常遇西風塵起，舉扇自蔽。徐曰：元規塵汚人。自漢魏以來，羣臣不拜山陵，導以元帝睞同布衣，匪惟君臣而已。每一崇進，皆就拜，不勝哀戚。由是詔百官拜陵，自導始也。咸和五年，亮時年六十四，帝舉哀于朝堂三日，遣大鴻臚持節監護喪事，賜祔之禮。一依漢博陸侯及安平獻王故事。及葬，給九游輜輶車，黃屋左纛，前後

羽葆鼓吹武賁班劍百人中興名臣莫與爲比

八編類纂



八編類纂卷之一百五十

左編

臣類

相戶

晉郗鑒

中興

郗鑒字道徽高平金鄉人少孤貧博覽經籍躬耕隲
畝吟咏不倦以儒雅著名不應州命趙王倫辟爲掾
知倫有不臣之迹稱疾去職及倫篡其黨皆至大官
而鑒閉門自守不染逆節及京師不守寇難鋒起鑒
遂陷于陳午賊中午以鑒有名于世將逼爲主鑒逃
而獲免午尋潰散鑒得歸鄉里于時所在饑荒州中

之士素有感其恩義者賴相與資贍鑒復分所得以
卹宗族及鄉曲孤老賴而全濟者甚多咸相謂曰今
天子播越中原無伯當歸依仁德可以後亡遂共推
鑒爲主舉千餘家俱避難于魯之嶧山元帝初鎮江
左承制假鑒兖州刺史鎮鄒山時荀藩用李述劉琨
用兄子演並爲兖州各屯一郡以力相傾闔州編戶
莫知所適又徐龕石勒左右交侵日尋干戈外無救
援百姓饑饉或掘野鼠蟄燕而食之終無叛者三年
間衆至數萬帝就加都督兖州諸軍事永昌初徵拜
尚書時明帝初卽位王敦專制內外危逼謀伐鑒爲

蓋分錢於
大言機設
德武

外援由是拜安西將軍都督揚州江西諸軍假節鎮

合肥敦忌之表為尚書令徵還道經姑孰與敦相見

敦謂曰樂彥輔短才耳後生流宕言違名檢考之以

實豈勝滿武秋邪彥輔樂廣字也廣與王衍俱宅心

王樂為稱首武鑒曰擬人必于其倫彥輔道韻平淡

體識冲粹處傾危之朝不可得而親疏及愍懷太子

之廢可謂柔而有正武秋失節之士何可同日而言

敦曰愍懷廢徙之際交有危機之急人何能以死守

之乎以此相方其不減明矣鑒曰丈夫既潔身北面

義同在三豈可偷生屈節覲顏天壤邪苟道數終極

固當存亡以之耳。敦素懷無君之心。聞鑒言。大忿之。遂不復相見。拘留不遣。敦之黨與潛毀日至。鑒舉止自若。初無懼心。敦謂錢鳳曰。邾道微儒雅之士。名位既重。何得害之。乃放還臺鑒。遂與帝謀滅敦。既而錢鳳攻逼京師。議者以王含錢鳳衆力百倍。苑城小而不可固。宜及軍勢未成大駕自出距戰。鑒曰。羣逆縱逸其勢不可當。可以筭屈。難以力競。凡含等號令不一。抄盜相尋。百姓懲往年之暴。皆人自爲守。乘逆順之勢。何往不克。且賊無經畧遠圖。惟恃彘突一戰曠日持久。必啟義士之心。今謀猷得展。今以此弱力敵彼。

驍寇決勝負于一朝。定成敗于呼吸。雖有中胥之徒。義不投袂。何補于旣往哉。帝從鑒。以尚書令領諸屯營。及鳳等。平溫嶠。上議請宥敦佐吏鑒。以爲先王崇君臣之教。故貴伏死之節。昏亡之主。故開待放之門。王敦佐吏。雖多逼迫。然居迷亂之朝。無出關之操。準之前訓。宜加義責。又秦錢鳳母年八十。宜蒙全宥。乃從之。封高平侯。帝以其有器望。萬機動靜。輒問之。乃詔鑒特草上表疏。以從簡易。王導議欲贈周札官。鑒以爲不合。導不從。鑒于是駭之。曰。敦之逆謀。履霜日久。緣札開門。令王師不振。若敦前者之舉。義同桓文。

則先帝可爲幽厲。邪朝臣雖無以難，而不能從。俄而遷都督徐、兗、青三州軍事，假節鎮廣陵。尋而帝崩，鑒與王導、卞壺、溫嶠、庾亮等並受遺詔，輔少主。咸和初，領徐州刺史。及祖約、蘇峻反，鑒聞難，便欲率所領東赴，詔以北寇不許。于是遣司馬劉矩領三千人宿衛京師。尋而王師敗績，矩遂退還中書。令庾亮宣太后口詔，進鑒爲司空，鑒去賊密邇，城孤糧絕，人情業業，莫有固志。奉詔流涕，設壇塲，刑白馬，大誓三軍，曰：「賊臣祖約、蘇峻，不恭天命，不畏王誅，凶戾四迸，干國之紀。凌汨五常，侮弄神器，遂制脅幽主，扳本塞源，殘害

忠良禍虐黎庶使天地神祇靡所依歸是以率土焦
酷兆庶泣血咸願奉辭罰罪以除元惡昔戎狄泯周
齊桓糾盟董卓陵漢羣后致討義存君親古今一也
今主上憂危百姓倒懸忠臣正士志存報國凡我同
盟旣盟之後戮力一心以救社稷若二寇不梟義無
偷生有渝此盟明神殛之鑒登壇慷慨三軍爭爲用
命乃遣將軍夏侯長等間行謂平南將軍溫嶠曰今
賊謀欲挾天子東入會稽宜先立營壘屯據要害旣
防其越逸又斷賊糧運然後靜鎮京口清壁以待賊
賊攻城不拔野無所掠東道旣斷糧道自絕不過百

日必自潰矣。嶠深以爲然。及陶侃爲盟主進鑒都督揚州八郡軍事。時撫軍將軍王舒。輔軍將軍虞潭。皆受鑒節度。率衆渡江。與侃會于笱子浦。鑒築白石壘而據之。會舒潭戰不利。鑒與後將軍郭默還丹徒。立大業曲阿慶亭三壘以拒賊。而賊將張健來攻大業。城中乏水。郭默窘迫。遂突圍而出。三軍失色。參軍曹納以爲大業京口之扞。一旦不守。賊方軌而前。勸鑒退還廣陵以俟復舉。鑒乃大會僚佐。責納曰。吾蒙先帝厚恩。荷託付之重。正復捐軀九泉。不足以報。今強寇在郊。衆心危迫。君腹心之佐。而生長異端。當何以

率先義衆鎮一三軍邪將斬之、从而乃釋、會峻死、衆業圍解、及蘇逸等走吳興、鑒遣參軍李閔追斬之、降男女萬餘口、拜司空、時賊師劉微聚衆數千、浮海抄東南諸縣、鑒遂城京口、加都督揚州晉陵吳郡諸軍事、率衆討平之、進位太尉、後以寢疾上疏遜位、曰、臣疾彌留、遂至沉篤、自忖氣力差理難冀、有生有死、自然之分、但忝位過其才、曾無以報、上慚先帝、下愧日月、伏枕哀歎、抱恨黃泉、臣今虛乏、救命朝夕、輒以府事付長史劉遐、乞骸骨歸丘園、惟陛下崇山海之量、弘濟大猷、任賢使能、事從簡易、使康哉之歌、復興于

今則臣雖死猶生之日耳臣所統錯雜率多北人或
逼遷徙或是新附百姓懷土皆有歸本之心臣宜圖
恩示以好惡處與田宅漸得少安聞臣疾篤衆情駭
動若當北渡必啟寇心太常臣謨平簡真正素望所
歸謂可以爲都督徐州刺史臣亡兄子晉陵內史邁
謙愛養士甚爲流亡所宗又是臣門戶子弟堪任充
州刺史公家之事知無不爲是以敢希祁奚之舉疏
奏以蔡謨爲鑒軍司鑒尋薨時年七十一謚曰文成
初鑒值永嘉喪亂在鄉里甚窮餒鄉人以鑒名德傳
共飴之時兄子邁外甥周翼並小常携之就食鄉人

曰各自饑困以君賢欲共相濟耳恐不能兼有所宜
鑒于是獨往食訖以飯著兩頰邊還吐與二兒後並
得存同過江邁位至護軍翼爲剡縣令鑒之薨也翼
追撫育之恩解職而歸席苦心喪三年

晉謝安

謝安字安石河南人也弱冠詣王濛清言良久旣去
濛子修白向客何如大人濛曰此客臺臺爲來逼人
王導亦深器之由是少有重名寓居會稽與王羲之
及高陽許詢桑門支遁游處出則漁弋山水入則言
詠屬文無處世意揚州刺史庾冰以安有重名必欲

致之累下郡縣敦逼不得已赴召月餘告歸吏部尚書范汪舉安爲吏部郎安以書拒絕之有司奏安被召歷年不至禁錮終身遂棲遲東土嘗往臨安山中坐石室臨濬谷悠然歎曰此亦伯夷何遠嘗與孫綽等汎海風起浪湧諸人並懼安吟嘯自若舟人以安爲悅猶去不止風轉急安徐曰如此將何歸邪舟人承言卽迴衆咸服其雅量安雖放情丘壑然每遊賞必以妓女從旣累辟不就簡文帝時爲相曰安石旣與人同樂必不得不與人同憂召之必至時安弟萬爲西中郎將總藩任之重安雖處衡門其名價出萬

之右、自幼有公輔之望、處家常以儀範訓子弟、安妻
丹陽尹劉惔妹也、既見家門富貴、而安獨靜退、乃謂
曰、丈夫不如此也、安掩鼻曰、恐不免耳、及萬黜廢、安
始有仕進志、時年已四十餘矣、征西大將軍桓溫請
爲司馬、將發新亭、朝士咸就中丞高崧戲之曰、卿累
違朝旨、高臥東山、諸人每相與言、安石不肯出、將如
蒼生何、蒼生今亦將如卿何、安甚有愧色、既到、溫甚
喜、言平生歡笑竟日、既出、溫問左右頗嘗見我有如
此客不、溫後詣安、值其理髮、安性遲緩、久而方罷、使
取幘、溫見留之曰、令司馬著帽進、其見重如此、溫嘗

北征會萬病卒。安投牋求歸。尋除吳興太守。在官無
當時譽。去後爲人所思。頃之徵拜侍中。遷吏部尚書。
護軍中書侍郎。郗超初爲桓溫參軍。每與溫密謀。朝
中皆畏事之。安嘗與左衛將軍王坦之共詣超。日將
未得前。坦之欲去。安曰。獨不能爲性命忍須臾邪。簡
文帝疾篤。溫上疏薦安。宜受顧命。且望簡文臨終。禪
位于已。不爾。便爲周公居攝。及帝崩。遺詔止依諸葛
武侯王丞相故事。溫不副所望。故甚憤怨。與弟冲書
曰。遺詔使吾依武侯王公故事耳。王謝處大事之際。
日憤憤少懷。溫乃入赴山陵。止新亭。大陳兵衛。將移。

晉室呼安及王坦之欲于坐害之坦之甚懼問計于
安安神色不變曰晉祚存亡在此一行既見溫坦之
流汗沾衣倒執手板安從容就席坐定謂溫曰安聞
諸侯有道守在四鄰明公何須壁後置人邪溫笑曰
正自不能不爾遂笑語移日郗超臥帳中聽其言論
風動帳開安笑曰郗生可謂入幕之賓矣坦之與安
初齊名至是方知坦之之劣溫嘗以安所作簡文帝
謚議以示坐賓曰此謝安石碎金也時孝武帝富于
春秋政不自己溫威振内外人情嚙嚙互生同異安
與坦之盡忠匡翼終能斬穆及溫病篤諷朝廷加九

錫使袁宏具草安見輒改之由是歷旬不就會溫薨
錫命遂寢尋爲尚書僕射領吏部加後將軍及中書
令王坦之出爲徐州刺史詔安總中書事時王彪之
爲尚書令安以天子幼冲欲請崇德太后臨朝彪之
曰上年垂及冠婚反令從嫂臨朝豈所以光揚聖德
乎安不欲委任桓冲故使太后臨朝已得專決遂不
從其言彪之與共掌朝政安每歎曰朝廷大事衆所
不能決者以諮王公無不立決安義存輔導雖會稽
王導子亦賴弼詣之益強敵寇境邊書續至梁益不
守樊鄢陷沒安每鎮以和靖御以長算德政既行文

武用命不存小察弘以大綱威懷外著人皆比之王
導謂文雅過之嘗與王羲之登冶城悠然遐想有商
世之志羲之謂口夏禹勤王手足胼胝文王旰食日
不暇給今四郊多壘宜思自效而虛談廢務浮文妨
要恐非當今所宜安曰秦任商鞅二世而亡豈清言
致患邪是時宮室毀壞安欲繕之尚書令王彪之等
以外寇爲諫安不從竟獨決之宮室用成皆仰模玄
象合體辰極而役無勞怨桓沖以謝安素有重望欲
以揚州讓之自求外出桓氏族黨皆以爲非計莫不
扼腕苦諫都超亦深止之沖皆不聽詔沖都督徐豫

兖青揚五州諸軍事徐州刺史鎮京口以安領揚州
刺史並加侍中九月帝講孝經始覽典籍延儒士謝
安薦東莞徐邈補中書舍人每被顧問多所匡益帝
或宴集酣樂之後好爲手詔詩章以賜侍臣或文辭
率爾所言穢雜邈應時收歛還省刊削皆使可觀經
帝重覽然後出之時議以此多邈尋詔安以甲仗百
人入殿太元元年特帝始親萬機進安中書監錄尚
書事于時懸象失度亢旱彌年安奏興滅繼絕求晉
初佐命功臣後封之三年以安都督揚豫等州軍事
以桓沖都督江荆等州軍事謝玄監江北軍事桓沖

爭功競位
豈亦清言
所啓

以秦人彊盛欲移阻江南秦自江陵徙鎮上明使劉
波守江陵楊亮守江夏初中書郎郗超自以其父愔
位遇應在謝安之右而優游散地常憤邑形于詞色
由是與謝氏有隙時朝廷方以秦寇爲憂詔求文武
良將可鎮禦北方者安以兄子玄應詔超聞之歎曰
安之明乃能違衆舉親玄之才足以不負所舉衆咸
以爲不然超曰吾嘗與玄共在桓公府見其使才雖
履屐間未嘗不得其任是以知之時符堅彊盛疆場
多虞諸將敗退相繼安遣弟石及兄子玄等應機征
討所在克捷八年堅率衆號百萬次于淮淝京師震

然相喻

靜而能辨

恐加安征討大都督玄入問計安夷然無懼色荅曰
已別有旨既而寂然玄不敢復言乃令張玄重請安
遂命駕出山墅親朋畢集方與玄圍碁賭別墅安碁
常劣于玄是日玄懼便爲敵手而又不勝安顧謂其
甥羊曇曰以墅乞汝安遂游涉至夜乃還指授將帥
各當其任桓沖深以根本爲憂遣精騎三千人援安
固却之曰朝廷處分已定兵甲無缺宜留以防西藩
沖歎曰安石有廟堂之量不閒將略今大敵垂至方
游談不暇遣諸不經事少年拒之衆又寡弱天下事
已可知吾其左社矣玄等旣破堅有驛書安方與客

又第推
達於安玄
不似

圍碁看書既竟便攝放床上了無喜色碁如故客問
之徐荅曰小兒輩遂已破賊既罷還內過戶限心喜
甚不覺展齒之折其矯情鎮物如此以總統功進拜
太保八月安奏請乘符氏傾敗開拓中原以徐充二
州刺史謝玄爲前鋒都督帥豫州刺史桓石虔等伐
秦玄至下邳秦徐州刺史趙遷棄城走玄進據彭城
九月謝玄使彭城內史劉牢之攻秦兖州刺史張崇
崇棄鄆城奔燕牢之據鄆城河南城堡皆來歸附太
保安自求北征加安都督揚江等十五州諸軍事加
黃鉞是時桓冲聞謝玄等有功自以失言慚恨成疾

苦言非清
言也

而卒、荆江二州並缺、物論以玄動望、宜以授之、安以
父子皆著大勲、恐爲朝廷所疑、又懼桓氏失職、桓石
虔復有沔陽之功、慮其驍猛在形勝之地、終或難制、
乃以桓石民爲荊州、改桓伊爲中流、石虔爲豫州、旣
以三桓據三州、彼此無怨、各得所任、其經遠無兢類
皆如此、性好音樂、自弟萬喪十年不聽音樂、及登台
輔、基喪之慘、不廢絲竹、王坦之屢書苦諫曰、天下之
寶當爲天下惜之、安不能從、衣冠效之、遂以成俗、又
于上山營墅、樓館林竹甚盛、每携中外子姪往來游
集、肴饌亦屢費百金、世頗以此譏焉、而安殊不以屬

意常疑劉牢之不可獨任。又知王味之不宜專城。寧之既以亂終。而味之亦以貪敗。由是識者服其知人。時會稽王道子專權而奸諂。頗有相扇搆安出鎮廣陵之步丘。築壘曰新城以避之。帝出祖于西池。獻鵞賦詩焉。安雖受朝寄。然東山之志。始末不渝。每形於言色。及鎮新城。盡室而行。造汎海之裝。欲須經畧。粗定。自江道還東。雅志未就。遂遇疾篤。上疏請量宜旌旆。并召子征虜將軍琰解甲息徒。命龍驤將軍朱序進據雒陽。前鋒都督玄抗威彭沛。委以董督。若二賊假延。來年水生。東西齊舉。詔遣侍中慰勞。遂還都。聞

當輿入西州門、自以本志不遂、深自慨失、因悵然謂所親曰、昔桓溫在時、吾常懼不全、忽夢乘溫輿行十六里、見一白雞而止、乘溫輿者、代其位也、十六里者、至今十六年矣、白雞主酉、今太歲在酉、吾病殆不起乎、乃上疏遜位、詔遣侍中尚書喻旨、先是安發石頭、金鼓忽破、又語未嘗謬而忽一誤、衆亦怪異之、尋薨、時年六十六、安少有盛名、時多愛慕、鄉人有罷中宿縣者、還詣安、安問其歸資、答曰、有蒲葵扇百萬、安乃取其中者捉之、京師士庶競市、價增數倍、安本能爲洛下書生詠、有鼻疾、故其音濁、名流愛其詠而弗能

及或手掩鼻以數之。及至新城築埭於城北。後人追思之。名爲召伯埭。羊曇者。太山人知名士也。爲安所愛重。安薨後。輟樂彌年。行不出西州路。嘗因石頭大醉。扶路唱樂。不覺至州門。左右白曰。此西州門。曇悲感不已。以馬策扣扉。誦曹子建詩曰。生存華屋處。零落歸山丘。慟哭而去。

唐朱敬則

朱敬則。亳州永城人。以孝義世被旌顯。一門六闕。相望。敬則志尚恢博。好學重節義。然諾善與人交。賑其急難。不責報于人。與左史江融。左僕射魏元忠。善咸。

亨中高宗聞其名召見異之爲中書李敬元所毀故授洹水尉久之除右補闕初武后稱制天下頗流言遂開告密羅織之路興大獄誅將相大臣至是已革命流言益寧敬則諫曰臣聞李斯之相秦也行商申之法重刑名之家杜私門張公室棄無用之費損不急之官惜日愛功亟戰疾耕旣庶而富遂屠諸侯此救弊之術也故曰刻苛可施於進趨變詐可陳於攻戰天下已平故可易之以寬簡潤之以淳和秦乃不然淫虐滋甚往而不返卒至土崩此不知變之禍也陸賈叔孫通事漢祖當榮陽成臯間糧餉窮智勇困

未嘗敢開一說效一奇。惟進豪猾貪暴之人及區宇
逋定。乃陳詩書說禮樂。開王道。高帝忿然曰。吾以馬
上得之。安事詩書對曰。馬上得之。可馬上治之乎。帝
默然。於是賈著新語。通定禮儀。此知變之善也。向若
高帝斥二子。置詩書。重攻戰。尊首級。則複道爭功。拔
劒擊柱。晷漏不保。何十二帝二百年乎。故曰仁義聖
人之蘧廬。禮者先王之陳迹。祠祝畢。芻狗捐。淳精流
糟粕。棄仁義尚爾。況其輕乎。國家自文明以來。天地
草昧。內則流言。外則構難。故不設鉤距。無以順人。不
切刑罰。無以息暴。於是置神器。開告端。故能不出房

世所也
生人亦欲
死人

聞而天下晏然易主矣臣聞急趨者無善迹促柱者
無和聲拯溺不規行療饑不鼎食卽向時秘策今之
芻狗也顯鑒秦漢之失考時事之宜毀遽廬遺糟粕
下寬大之令流曠蕩之策去萋斐之角牙頓姦險之
芒刃塞羅織之妄源掃朋黨之顯迹曠然使天下更
始豈不樂哉后善其言遷正諫大夫兼修國史乃請
高史官選以求名才侍中韋安石嘗閱其史奏嘆曰
董狐何以加世人不知史官權重宰相宰相但能制
生人史官兼制生死古之聖君賢臣所以畏懼者也
時賦歛繁重民多蕩析后數召入禁中訪失得進同

鳳閣鸞臺平章事、張易之搆魏元忠、張說欲誅之、無
敢言者、敬則獨奏曰、元忠說秉心忠一、而所坐無名
殺之、失天下望、乃得不死、以老疾還政事、俄改成均
祭酒、冬、官侍郎、易之等集名儒、撰三教珠英、又繪武
三思、李嶠、蘇味道、李迥秀、王紹宗等十八人像、以爲
圖、欲引敬則固辭、不與、世潔其爲人、出爲鄭州刺史、
遂致仕、侍御史冉祖雍誣奏與王同校善、貶涪州刺史、
史旣明其非罪、改廬州、代還、無淮南一物、所乘止一
馬、子曹步從、以歸、卒年七十五、敬則與三從昆弟居
四十年、貲產無異、及執政、每以用人爲先、細務不省

也。嶺表蠻叛，以裴懷古有文武才，用爲桂州都督，蠻服其威惠，相率降。薦魏知古爲鳳閣舍人。張思敬爲右史，皆稱職。初二，張瑾寵盛，敬則密謂敬暉曰：「公若假太子令，舉北軍誅易之兄弟，兩飛騎力耳。」暉卒用其策。始，崔寔仲長統王朗曹冏論封建，指秦爲失。敬則以爲秦漢世禮義陵遲，不可復用周制。封諸侯，著論明之。儒者以爲知言。睿宗嗣位，嘗曰：「神龍以來，忠於本朝者，李多祚、王同皎、韋月將、燕欽融，並褒復矣。尚有遺者邪？」劉幽求曰：「朱敬則忠正義立，天下所推往，爲宗楚客、冉祖雍等所誣，請守刺史。」張安中、許紹

臣口相王必受命當悉心事之及韋氏千紀臣遂見
危赴難雖天誘其衷亦敬則啟之於是追贈秘書監
謚曰元

李昭德

李昭德長安人擢明經累官夏官侍郎如意元年拜
鳳閣侍郎同平章事武后營神都昭德規劃文昌臺
及定鼎上東諸門標置華壯洛有二橋司農卿韋機
徙其一直長夏門民利之其一橋廢省巨萬計然洛
水歲涇蓄之繕者告勞昭德始積石爲脚銳其前厥
殺暴濤水不能怒自是無患俄檢校內史薛懷義討

卷

卷

突厥以昭德爲行軍長史不見虜還武承嗣仕文昌
左相昭德諫曰承嗣已王不宜典機衡以惑衆庶且
父子猶相篡奪況姑姪乎后矍然曰我未之思也乃
罷承嗣爲太子少保洛陽人王慶之率險佞數百人
請以承嗣爲皇太子后不許固請后遣昭德詰其故
昭德咎殺慶之餘黨散走因奏曰自古有姪爲天子
而爲姑立廟乎以親親言之天皇陛下夫也皇嗣陛
下子也當傳之子孫爲萬世計陛下承天皇顧託而
有天下又立承嗣臣見天皇不來食矣后乃立承嗣
悞譖短之后曰吾任昭德而獲安枕是代我勞非而

所知也。有人獲洛水白石而赤文者，獻闕下，曰：「此石赤心故，以獻昭德。」叱曰：「洛水餘石，豈盡欲反邪？」時來俊臣、侯思止舞文法，數誅陷大臣，人皆慄懼。昭德每奏其誣罔不道狀，卒榜殺思止，其黨稍摧沮。然昭德頗怙權，爲衆指目。魯王府功曹參軍丘愔上疏果毅鄧汪，又著石論數千言，述其專恣。鳳閣舍人逢弘敏以聞，后由是惡之。謂宰相姚璿曰：「誠如所言。」昭德固負國矣。乃貶欽州南賓尉。俄召授監察御史。萬歲通天二年，來俊臣與昭德素不協，誣以謀逆。旣而俊臣亦下獄，同日誅。時甚雨，衆庶莫不冤昭德而快俊臣。

謂曰、今日天時、可謂一悲一喜矣、神龍二年、贈左御史大夫、建中三年、加贈司空

婁師德

婁師德、鄭州原武人、第進士、上元初爲監察御史、會吐蕃盜邊、劉審禮戰沒、師德奉使收敗亡於洮河、因使吐蕃、其首領論贊婆等自赤嶺操牛酒迎勞、師德喻國威信、開陳利害、虜爲畏悅、後募勇士討吐蕃、乃自奮戴紅抹額來應詔、高宗假朝散大夫、使從軍有功、遷河源軍司馬、并知營田事、與虜戰白水澗、八遇八克、天授初爲豐州都督、衣皮袴率士屯田積穀數

百萬兵以饒給、無轉餽和糴之費、武后降書勞之、長壽元年進同鳳閣鸞臺平章事、后嘗謂師德師在邊、必待營田、公不可以劬勞憚也、乃復以爲河蘭鄯廓州檢校營田大使、入遷御史大夫知政事、證聖中與王孝傑拒吐蕃於洮河州、戰素羅汗山、敗績、貶原州司馬、萬歲通天二年入爲鳳閣侍郎同平章事、後與武懿宗、狄仁傑分道撫定河北、進納言、隴右諸軍大使、復領營田、聖曆三年突厥入寇、詔檢校并州長史天平軍大總管、九月卒于會州、年七十、贈幽州都督、謚曰貞、狄仁傑未輔政、師德薦之、及同列數辭、令外

使武后覺問仁傑曰師德賢乎對曰爲將謹守賢則不知也又問知人乎對曰臣嘗同僚未聞其知人也后曰朕用卿師德所薦也誠知人矣出其奏仁傑慙已而歎曰婁公盛德我爲所容乃不知吾不逮遠矣總邊要爲將相者三十年恭勤樸忠無適莫方酷吏殘驚人多不免獨能以功名始終與郝處俊相亞世之言長者稱婁郝

狄仁傑

狄仁傑字懷英并州太原人爲兒時門下有被害者吏就詰衆爭辨對仁傑誦書不置吏讓之荅曰黃卷

中。方與聖賢對。何暇偶俗吏語耶。舉明經調汴州參軍。爲吏誣訴黜陟使閻立本召訊。異其才。謝曰。仲尼稱觀過知仁。君可謂滄海遺珠矣。薦授并州法曹參軍。親在河陽。仁傑登太山。反顧見白雲孤飛。謂左右曰。吾親舍其下。瞻悵久之。雲移乃得去。同府參軍鄭崇質母老且疾。當使絕域。仁傑謂曰。君可遺親萬里憂乎。詣長史蘭仁基請代。行仁基咨美其誼。時方與司馬李孝廉不平。相語曰。吾等可少媿矣。相待如初。每日。狄公之賢。北斗以南。一人而已。稍遷大理寺丞。歲中斷久獄萬七千人。時稱平恕。左威衛大將軍權

善才、右監門中郎將范懷義、誤坐斧昭陵栢、罪當免。
高宗詔誅之。仁傑奏不應死。帝怒曰：「是使我爲不孝
子，必殺之。」仁傑曰：「漢有盜高廟玉環，文帝欲當之族。
張釋之廷諍曰：『假令取長陵一抔土，何以加其法？』於
是罪止棄市。陛下之法，在象魏，固有差等，犯不至死，
而致之死，何哉？今誤伐一栢，殺二臣，後世謂陛下爲
何如主？帝意解，遂免死。數日授侍御史、左司郎中。王
本立怙寵自肆，仁傑劾奏其惡，有詔原之。仁傑曰：「朝
廷雖乏賢，如本立者不少。陛下惜有罪，虧成法，奈何？」
臣願先斥爲羣臣戒。本立抵罪，繇是朝廷肅然，使岐

州亡卒數百、剽行人道不通、官捕繫盜黨窮訊而餘
曹紛紛不能制、仁傑曰、是其計窮、且爲患、乃明開首
原格、出繫者、稟而縱之、使相曉、皆自縛歸、帝歎其達
權宜、遷度支郎中、帝幸汾陽宮、爲知頓使、并州長史
李冲玄以道出、妬女祠、俗言盛服過者致風雷之變、
更發卒數萬、改馳道、仁傑曰、天子之行、風伯清塵、雨
師灑道、何妬女避邪、止其役、帝壯之曰、真丈夫哉、出
爲寧州刺史、撫和戎落、得其懽心、郡人勒碑以頌、入
拜冬官侍郎、持節江南巡撫使、吳楚俗多淫祠、仁傑
一禁止、凡毀千七百屋、止留夏禹吳泰伯季札伍員

四祠而已。轉文昌右丞，出豫州刺史。時越王兵敗，支黨餘二千人，論死。仁傑釋其械，密疏曰：「臣欲有所陳，似爲逆人申理，不言且累陛下欽恤意，表成復毀，自不能定。然此皆非本惡。」詎誤至此。有詔悉謫邊戍，囚出寧州。父老迎勞曰：「狄使君活汝邪？」囚相與哭。碑下，因齋三日乃去。至流所，亦爲立碑。初，宰相張光輔討越王，軍中恃功多暴索。仁傑拒之，光輔怒曰：「州將輕元帥邪？」仁傑曰：「亂河南者一越王，公董士三十萬以平亂。縱使暴橫，使無辜之人咸墜塗炭，是一越王死百越王生也。且王師之至，民歸順以萬計，自縊而下。」

四面成蹊奈何縱邀賞之人殺降以爲功冤痛徹天如得上方斬馬劒加君頸雖死不恨光輔還奏仁傑不遜左授復州刺史天授二年以地官侍郎同鳳閣鸞臺平章事武后謂曰卿在汝南有善政然有譖卿者欲知之乎謝曰陛下以爲過臣當改之以爲無過臣之幸也譖者乃不願知后歎其長者時太學生謁急后亦報可仁傑曰人君惟生殺柄不以假人至簿書期會宜責有司尚書省決事左右丞不旬杖左右丞相不判徙況天子乎學徒取告丞簿職耳若爲報可則胄子數千凡幾詔邪爲定令示之而已后納其

言會爲來俊臣所構捕送制獄于時訊反者一問卽承聽減死俊臣引仁傑置對荅曰有周革命我乃唐臣反固實俊臣乃挺擊其屬王德壽以情謂曰我意求少遷公爲我引楊執柔爲黨公且免死仁傑歎曰皇天后土使仁傑爲此乎卽以首觸柱血流沫面德壽懼而謝守者寢弛卽丐筆書帛置楮衣中好謂吏曰方暑請付家撤絮仁傑子光遠得書上變后遣使案視俊臣命仁傑冠帶見使者私令德壽作謝死表附使以聞后乃召見仁傑謂曰承反何耶對曰不承反死咎掠矣示其表曰無之后知代署因免死武承

嗣屢請誅之后曰命已行不可返時同被誣者鳳閣
侍郎任知古等七族悉得貸御史霍獻可以首叩殿
階苦爭必欲殺仁傑等乃貶仁傑彭澤令邑人爲置
生祠萬歲通天中契丹陷冀州河北振動擢仁傑爲
魏州刺史前刺史懼賊至驅民保城修守具仁傑至
曰賊在遠何自疲民萬一虜來吾自辦之何預若輩
悉縱就田虜亦引去民愛仰之復爲立祠俄轉幽州
都督賜紫袍龜帶后自製金字十二於袍以旌其忠
召拜鸞臺侍郎復同平章事時發兵戍疏勒四鎮百
姓怨苦仁傑諫曰天生四夷皆在先王封域之外東

距滄海、西隔流沙、北橫大漠、南阻五嶺、天所以限中外也、自典籍所紀、聲教所暨、三代不能至者、國家旣已兼之、詩人矜薄伐於太原、化行於江漢、前代之遐裔、而我之域中、過夏商遠矣、今乃用武荒外、邀功絕域、竭府庫之實、以爭磽确不毛之地、得其人、不足以增賦、獲其土、不可以耕織、苟求冠帶遠夷、不務固本安人、此秦皇漢武之所行也、傳曰、與覆車同軌者、未嘗安、此言雖小、可以喻大臣伏見國家師旅歲出、調度之費、徂以寢廣、右戍四鎮、左屯安東、杼軸空匱、轉輸不絕、役行旣久、怨曠日多、上不是恤、則政不行、政

不行則害氣作、害氣作則蟲螟生、水旱起矣、方今關

○字○如○之○

東荐饑、蜀漢流亡、江淮而南、賦歛不息、人不復本、則

相率爲盜、本根一搖、憂患非淺、所以然者、皆貪功方

外、耗竭中國、昔漢元帝納賈捐之之謀、而罷珠崖、宣

帝用魏相之策、而棄車師、貞觀中、克平九姓、冊拜李

思摩爲可汗使、統都部夷狄、叛則伐、降則撫、得推亡

固存之義、無遠戍勞人之役、今阿史那斛瑟羅皆陰

山貴種、代雄沙漠、若委之四鎮、以統諸蕃、建爲可汗、

追禦寇患、則國家有繼絕之美、無轉輸之苦、損四鎮

肥中國、罷安東、實遼西、省軍費于遠方、并甲兵于要

正言已得
乃在說

塞恒代之鎮重而邊州之備豐矣。且王者外寧容有
內危。陛下姑赦邊兵。謹守備。以逸待勞。則戰士力倍。
以主禦客。則我得其便。堅壁清野。寇無所得。自然深
人有顛隤之慮。淺人無虜獲之益。不數年。二虜不討
而服矣。又請廢安東。復高姓爲君。長省江南轉饟以
息民。不見納。張易之嘗從容問自安計。仁傑曰。惟勸
迎廬陵王。可以免禍。會后欲以武三思爲太子。以問
宰相。衆莫敢對。仁傑曰。臣觀天人未厭唐德。比匈奴
犯邊。陛下使梁王三思募勇士於市。踰月不及千人。
廬陵王伐之不決。口輒五萬。今欲繼殺非廬陵王。莫

后亦委廢
後如掌弄

可。后怒，罷議。久之，召謂曰：「朕數夢雙陸不勝，何也？」於是仁傑與王方慶俱在。二人同辭對曰：「雙陸不勝，無子也。天其意者，以儆陛下乎？且太子天下本，本一搖，天下危矣。文皇帝身蹈鋒鏑，勤勞而有天下，傳之子孫。先帝寢疾，詔陛下監國。陛下掩神器而取之，十有餘年，又欲以三思爲後。且姑姪與子母孰親？陛下立廬陵王，則千秋萬歲後，常享宗廟。三思立，廟不祔姑。后感悟，卽日遣徐彥伯迎廬陵王於房州。王至，后匿帳中，召見仁傑，語廬陵王事。仁傑敷奏，切至，涕下，不能止。后乃使王出，曰：「還爾太子。」仁傑降拜，頓首曰：「太

子歸。未有知者。人言紛紛。何所信。后然之。更令太子舍龍門具禮迎還。中外大悅。初吉頊李昭德數請還太子。而后意不回。唯仁傑每以母子天性爲言。后雖忤忍。不能無感。故卒復唐嗣。尋拜納言兼右肅政御史大夫。突厥入趙定。殺掠甚衆。詔仁傑爲河北道行軍元帥。假以便宜。突厥盡殺所得男女萬計。由五回道去。仁傑追不能逮。更拜河北安撫大使。將民多脅從於賊。賊已去。懼誅。逃匿。仁傑上疏曰。議者以爲虜人寇始。明人之逆順。或迫脅。或願從。或受僞官。或爲招慰。誠以山東之人。重氣一往死。不爲悔。比緣軍興。

調發煩重、傷破家產、剔屋賣田、人不爲售、又官吏侵漁、州縣科役、督趣鞭笞、情危事迫、不循禮義、投跡犬羊、以圖除死、此君子所愧、而小人之常、民猶水也、壅則爲淵、疏則爲川、通塞隨流、豈有常性、昔董卓之亂、神器播越、卓已誅、禽部曲無赦、故事窮變生、流毒京室、此由恩不溥洽、失在機先、今負罪之伍、潛竄山澤、赦之則出、不赦則狂、山東群盜、緣茲聚結、故臣以爲邊鄙警警不足憂、中土不寧可爲慮也、夫持大國者、不可以小治事、廣者不可以細分、人主所務、弗檢常法、願曲赦河北、一不問罪、詔可、還除內史、后幸三陽

宮、王公皆從、獨賜仁傑第一區、眷禮卓異、是時李楷
固、駱務整、討契丹、克之、獻俘含樞殿、后大悅、二人者、
本契丹李盡忠部將、盡忠入寇、楷固等數挫王師、後
兵敗來降、有司請論如法、仁傑稱其驍勇可任、若貸
死、必感恩納節、可以責功、至是凱旋、后舉酒屬仁傑、
賞其知人、授楷固左玉鈐衛將軍、燕國公、賜姓武、務
整右武威衛將軍、后將造浮屠大像、度費數百萬、官
不能足、更詔天下僧日施一錢助之、仁傑諫曰、工不
役鬼、必在役人、物不天降、終由地出、不損百姓、且將
何求、今邊陲未寧、宜寬征鎮之徭、省不急之務、就令

顧作以濟窮人。既失農時，是爲棄本，且無官助理，不得成。既費官財，又竭人力，一方有難，何以救之？后由是罷役。聖曆三年卒，年七十一。贈文昌右相，謚曰文惠。仁傑所薦進若張柬之、桓彥範、敬暉、姚崇等皆爲中興名臣。則天時，南海貢集翠裘，后以賜張昌宗。狄仁傑奏事，命與昌宗雙陸。則天曰：「賭何物？」仁傑曰：「以臣紫紵袍爲對。」賭昌宗翠裘，則天曰：「此裘價踰千金。」仁傑曰：「臣袍乃大臣朝見之衣。」翠裘乃嬖臣寵遇之服。對臣之袍，臣猶快快。昌宗神沮氣索，累局連北。仁傑對御襦裘謝恩而出。及光範門，遂付家奴衣之。縱

馬而去。

唐張東之

張東之字孟將襄陽人中進士第始調清源丞永昌
元年以賢良召時年七十餘東之爲第一授鳳閣舍
人時突厥默啜有女請和親武后欲令武延秀娶之
東之奏古無天子娶夷狄女以配中國王者忤旨出
爲合蜀二州刺史故事歲以兵五百戍姚州地險瘴
到屯輒死東之論其弊曰臣按姚州古哀牢國城土
荒外山岨水深漢世未與中國通唐蒙開夜郎滇笮
西哀牢不附東漢光武末始請內屬置永昌郡統之

賦其鹽布瓊巔以利中土其國西大秦附交趾奇珍
之貢不闕劉備據蜀甲兵不充諸葛亮五月渡瀘收
其產入以益軍使張伯岐選取勁兵以增武備故蜀
志稱亮南征後國以富饒此前世置郡以其利之也
今鹽布之稅不供珍奇之貢不入文戰之用不實於
戎行實貨之資不輸於大國而空竭府庫驅率平人
受役蠻夷肝腦塗地臣竊爲陛下惜之昔漢歷博南
山涉蘭倉水更置博南哀牢二縣蜀人愁苦行者作
歌曰歷博南越蘭津度蘭倉爲他人益譏其貪珍奇
之利而爲蠻夷所驅役也漢獲其利人且怨歌今減

耗國儲費調日廣使臣下赤子身膏草野骸骨不歸
老母幼子哀號望祭於千里之外朝廷無絲髮利而
百姓蒙終身之酷臣竊爲國家痛之往諸葛亮破南
中卽用渠帥率統之不置漢官不留戍兵言置官留
軍有三不易置官必夷漢雜居猜嫌將起留兵轉糧
爲患滋重後忽反叛勞費必甚故粗設綱紀自然久
定臣謂亮之策誠盡羈縻蠻夷之要今姚州官屬旣
無固邊厭寇之心又無亮且縱且擒之技惟詭謀狡
笑恣情割剝扇動酋渠遣成朋黨折支詭笑取媚蠻
夷拜跪趨伏無復爲恥提挈子弟嘯引凶愚聚會蒲

博一擲累萬。凡逋逃亡命在彼州者戶贏二千。專事剽奪。且姚州本龍朔中武陵王。子仁奏置。其後長史李孝讓辛文協死於羣蠻。詔遣郎將趙武賢討擊。兵無噍類。又以將軍李義總繼往。而郎將劉會基戰死。其州遂廢。臣竊以亮有三不易。其言卒驗。垂拱中。蠻郎將王善寶。昆州刺史樊乾福復請置州。言課稅自支。不旁取於蜀。及置州。掾李稜爲蠻所殺。延載中。司馬成琛更鎮瀘南七鎮。戍以蜀兵。蜀始擾矣。且姚府總管五十七州間。皆巨猾游客。國家設官。所以正俗防姦。而無恥之吏敗謬至此。今初害未止。恐驚

八
人
類
類
集
卷
之
五
十
四
三
擾之禍日滋。宜罷姚州。隸嵩府。歲時朝覲。同藩國。廢
瀘南諸鎮。而設關瀘北。非命使不許交通。增嵩屯兵。
擇清良吏以統之。臣愚以爲便。疏奏不納。俄爲荊州
大都督府長史。長安中。武后謂狄仁傑曰。安得一奇
士用之。仁傑曰。陛下求文章資歷。今宰相李嶠。蘇味
道足矣。豈文士。辭賦不足。與成天下務哉。后曰。然。仁
傑曰。荊州長史張柬之。雖老宰相材也。用之。必盡節
於國。卽召爲洛州司馬。他日又求人。仁傑曰。臣嘗薦
張柬之。未用也。后曰。遷之矣。曰。臣薦宰相而爲司馬。
非用也。乃授司刑少卿。遷秋官侍郎。後姚崇爲靈武

軍使將行，后詔舉外司爲相者。崇曰：「張柬之沉厚有謀，能斷大事，其人老，惟亟用之。」卽召見，拜同平章事，進鳳閣侍郎，誅二張也。柬之首發其謀，以功擢天官尚書，封漢陽郡公。不半歲，以漢陽郡王加特進，罷政事。柬之旣失權，願還襄州養疾，乃授襄州刺史。中宗爲賦詩祖道，又詔羣臣餞定鼎門外。至州，持下以法，雖親舊必深文致法，無所貸。時議以爲不能易撫楚之剽性焉。會漢水漲，齧城郭，柬之因壘爲隄，以遏湍怒，闔境賴之。又懇辭王爵，不許。俄及貶，又流瀧州。憂憤卒。年八十二。景雲初，贈中書令，謚文貞。授子一

官與之剛直不傳會然遂於學論次書數十篇

唐房琯

字異

琯雅自負以天下爲已任然用兵本非所長其佐李
揖劉秩等皆儒生未嘗更軍旅琯每宅曰彼曳落河
雖多能當我劉秩乎按史之評琯當矣然進明之讒
謂帝太子也而置之朔方河北河東空虛之地則未
然也朔方河北天下勁兵處厥後收復兩京卒賴朔
方士馬力琯之謀其可謂不忠哉進明小人奪顏真
卿軍權坐視張巡急不肯救其言何足深信唐末司
空圖謂琯建請以諸王爲都統節度安祿山聞之大

驚語雖不見於史。圖言必有稽據。蓋當艱危之時。以宗藩近屬。分布外鎮。使股肱王室。統繫人心。自是長策肅宗果復大業。我朝靖康亦以親王爲大元帥。賴以中興。此蓋瑄謀之驗。未可以迂濶目之也。